

共同經課-1 使徒行傳一章十五節~十七節、二十一節~二十六節

15 當時同聚集 ê 眾人約略一百二十名，彼得 tī 兄弟中 khiā 起來講，16 兄弟 ah，聖神借大衛 ê 嘴所讖語 chhoā 人掠耶穌 ê 猶大 ê，chit-ê 聖經應驗是應該。17 因為伊 bat kap 阮同列，koh tī chit-ê 工亦有份。21 所以主耶穌 tī 咱中間出入 ê 時，22 tùi 約翰行洗禮起，到耶穌離別咱受 chih 接 ê 日，所有常常 kap 阮做伴 ê 人，tī in 中間 tiòh 有一個 kap 阮 sa<sup>n</sup>-kap 做伊 koh 活 ê 干證。23 Tùi án-ni，舉兩人，就是約瑟，叫做 Pa-sat-pa，亦名 Iû-sū-to，koh 一個是 Má-thê-a。24 就祈禱，講，主 ah，你是 bat 眾人 ê 心 ê，tī chit 兩人中指明 tá-lòh 一人是你所揀 ê，25 來有份 tī chit-ê 工，kap 使徒 ê 職，就是猶大所離開 beh 去伊家已 ê 所在 ê。26 Tùi án-ni，kā in liam-khau；liam-tiòh Má-thê-a；伊就 kap 十一個使徒同列。

共同經課-2 詩篇一篇

1 無行 phái<sup>n</sup> 人 ê 計謀，無 khiā 罪人 ê 路，無坐侮慢 ê 人 ê 位，chit 號人有福氣。2 伊所歡喜 ê 就是耶和華 ê 律法；暝日三思 ê，也是伊 ê 律法；3 伊 beh 親像樹栽 tī 溪邊，照時結果子，伊 ê 葉也 boē 乾去；伊所做 ê 一盡興通。4 Phái<sup>n</sup> 人 m̄ 是 án-ni；是親像粗糠 hō 風吹散。5 所以 tī 審判，phái<sup>n</sup> 人 khiā-boē-tiâu；罪人 tī 義人 ê 會中，亦是 án-ni。6 因為耶和華知義人 ê 路，若是 phái<sup>n</sup> 人 ê 路會滅無。

共同經課-3 約翰壹書五章九節~十三節

9 人 ê 干證咱若承受伊，上帝 ê 干證是 khah 大；因為上帝 ê 干證是 chit-ê，就是論伊 ê Kiá<sup>n</sup> 伊有做干證。10 信上帝 ê Kiá<sup>n</sup> ê 人 tī 本身有 chit-ê 干證；m̄ 信上帝 ê 人便是 hō 伊做白賊 ê；因為伊未有信上帝論伊 ê Kiá<sup>n</sup> 所做 ê 干證。11 Koh hit-ê 干證是 chit-ê，就是上帝已經將永活 hō 咱，也 chit-ê 活是在 tī 伊 ê Kiá<sup>n</sup>。12 有伊 ê Kiá<sup>n</sup> ê，就有活；無有上帝 ê Kiá<sup>n</sup> ê，就無有活。13 我寫 chiah-ê hō lín 信上帝 Kiá<sup>n</sup> ê 名 ê，beh hō lín 知 lín 有永活。

共同經課-4 約翰福音十七章六節~十九節

6 你所賞賜我出 tī 世間 ê 人，我已經用你 ê 名對 in 顯明；in 本是你 ê，你用 in 賞賜我；in 亦已經守你 ê 道理。7 Ta<sup>n</sup> in 知見若你所 hō 我 ê，lóng 是 tùi 你來；8 因為你所 hō 我 ê 話，我已經 hō in；in 承受伊，亦確實知我對你出，koh 信你差我。9 我為 tiòh in 求；m̄ 是為 tiòh 世間求，就是為 tiòh 你所 hō 我 ê 人；因為 in 是你 ê。10 見若我 ê，就是你 ê；你 ê，就是我 ê；koh 我 tī in 有得 tiòh 榮光。11 Ta<sup>n</sup> 了後，我無 tī 世間；in tī 世間，我歸 tī 你。聖 ê 父 ah，願你 tī 你 ê 名，就是你所 hō 我 ê，來保守 in，hō in 做一個，親像咱一樣。12 我 kap in tī-teh ê 時，bat tī 你 ê 名，就是你所 hō 我 ê，來保守 in；我亦有照顧 in，其中無一個沉淪；只有 hit-ê 沉淪 ê 人 nā-tiā<sup>n</sup>，hō 聖經得 tiòh 應驗。13 Ta<sup>n</sup> 我就近你；我 iáu tiàm 世間講 chiah-ê 話，beh hō in 有我 ê 歡喜滿滿 tī in ê 心內。14 我已經將你 ê 道理 hō in；世間怨恨 in，因為 in 無屬世間，親像我無屬世間。15 我 m̄ 是求你 hō in 出世間，就是保守 in 脫離 phái<sup>n</sup>-ê。16 In 無屬世間，親像我無屬世間。17 願你用真理 hō in 成聖；你 ê 道理就是真理。18 親像你差我入世間，我亦有差 in 入世間。19 我為 tiòh in 來做聖，hō in 亦 tùi 真理來成聖。